



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim




tir yimiyim

TAPAK 8

Putin-i Trump dang Iran rara mechi takoksa tulu ajurutsü ashi

Zaragoza goalkeeper nem asaya 13 atema tenokdangba agütsü



VOL. XXIII ISSUE NO. 197 (ADOK 197) DIMAPUR ROGONÜ (FRIDAY) MONUPII (MAY) 01, 2026

₹ 5.00

Police-i central command centre ka amenokogo

Dimapur, Rongchii/April 30 (TYO): Dimapur Police atema East Police Station tasenba nung centralised command centre (CCC) ka Brehostibarnü Commissioner of Police, Dimapur, Aotula T Imchen, IPS-i semzüksüogo, koba yimti nung smart traffic management aser surveillance tajungba akumtsü asoshi tongtipang mera ka alitsü.

Iba sentong nung CP Dimapur, Imchen-i jembidang, iba inyakyim ya tilaka dang lir saka tongtipang mera ka lir ta ashi aser central ministry teyari nung National Clean Air Programme (NCAP) kübok CCTV aser ANPR (Automatic Number Plate Recognition) cameras tem inokogo, ta metetdaksü.

Dimapur telungzük aser temeket tesem balala nungi cameras 13-14 inokogo aser ANPR aser CCTV cameras ya kanga mazüngi aliba lemjem pezü - Dhobinallah Junction, Tragopan Point, Nagarjan Junction aser Purana Bazar Junction nung inok ta lai ashi.

Kanga mazüngi aliba tesemtem nung gari mesümenangba ajemdaksütsü, gari mapang talanglang mesütepa aliba ajanga mopung menenba ajemdaksütsü nükjidong nung iba project ya inyaker, ta ashi.

Ajidang masü iba system yagi mapa tamajung inyakba putetba nunga yaria gari

senzüsempogba tem mittsü aser record asütsü.

Command centre yagi traffic personnel tem meta nungi yaritsü, lenmang mesümenangba ketdangsuba tajungba akumtsü aser iba system ya ajanga control room nungi tenük balala ajanga traffic personnel ka kisünga yaritsü, ta Imchen-i ashi.

CP Dimapur-i iba project takok ngua inyakba atema state sorkar, central ministry, district administration aser DCP Traffic-i anir technical tema dang pelaba lemsatepa liasü.

Deputy Commissioner, Dimapur, Dr. Tinojongshi Chang-ia NCAP funding kanga ajema liaka iba mera ya tetenzükba tajung ka lir ta ashi.

Taoba küm traffic sensors inokba densema iba mesük project temi results tajung sayur aser tarutsü nung ano tesem timba nung inoktsü imlar, ta pai ashi.

Chang-isa nüburtem dang ketdangsur den amalitep akatsü aser inoka aliba oset kumzükä ayutsü ayongzük aser cameras tem mauyatsü mesüra meraksatsütsü ashi.

Iba system yagi gari senzüsempogba record asüba nung yaritsü, lendong atalokba bushisüngdangba nung yaritsü aser ozüng amshirtemi aibelener jangjateta apuba nung yaritsü, ta paisa ashi.

Government Hindi Institute belentsü Oriental Colony Council-i memulunger

Dimapur, Rongchii/April 30 (TYO): Oriental Colony, Dimapur nung aliba Government Hindi Institute tesem melenshia Medziphema sub-division kübok Pherima-i belentsü sentong aliba Oriental Colony Council-i memulunger.

Brehostibarnü Dimapur nung osangbener den jembidang Oriental Colony Council chairman Imtikumzuk-i ashiba agi, iba reju tang aliba tesem nungi belenba yagi tajangzük malitsü.

Iba ama mera yagi reju inyaksangshi nung tetsükdaksü ajurutsü aser kaketshir aser nüburtem asoshi timtem asütsü, ta ashi.

Iba reju ya 1968 kümamenokba mapang nungi Colony nung liasü aser timtem kecha makai shidak lapoka arur. Iba reju ya yangi tongtipang shilem ka kumogo aser region nung Hindi education temaba jenjangi ajungketba nung shilem tulu agia lir, ta pai ashi.

Tang aliba tesem ya ajaklen nungi mela-mela bushia aruteter aser kaketshir aser staff tem asoshia ayong-ayonger aser tesem melenshitsu atema ken o kecha meliasü. Tang aliba ki o jen aser temeket ya reju tiptema lapoktsü aser tarutsü nung terenlok asoshi tapet lir, ta Imtikumzuk-i ashi.

Tang iba reju ya ali tasazük 32,464 sq. ft. nung lir aser aji iba reju atema teperi lir.

Iba reju Oriental Colony, Dimapur nung aliba tesem melentsü sentong aliba anema Council-i tezüluba ka agütsüogo, saka tang tashi School Education Department nungi telangzüba mali, ta chairman-i ashi.

Reju tuluba akumtsü asoshi tesemmelenshiba ajanga kuli tejangja magütsür, kechiaser tang alidak ulushitsü tesem peria lir, ta DUCCF tir Zasivikho Zakiesato-ia ashi.

Pai-a department dang iba atema osang tejangja nüburtem nem agütsütsü ayongzükä liasü.

Higher Education atema HEART App sayaogo



Kohima nung April 29, 2026 nü Government College Principals Annual Conference 2026 alidang tangokba noksa ka nung Minister Temjen Imna Along aser dangartem angur.

Kohima, Rongchii/April 30 (TYO): Bodhbarnü Directorate of Higher Education, Nagaland ajanga anogo ka Government College Principals Annual Conference ayongzükba nung Nagaland nung aliba Government Colleges 17 nungi Principals ajunga adenshia shilem agia liasü.

Iba mungdang ya Hotel Japfu, Kohima nung ayongzük, koba state nung higher education tejakleni aotsü atema meyipa reprangshiba, külemi lungjamba aser arok külemi mangdang yangerba atema sapang tongtipang ka liasü.

Iba sentong nung tesemdang tongti ka ama Minister, Higher Education & Tourism, Government of Nagaland, Temjen Imna Along aden.

Minister den külemi Sarita Yadav, IAS, Secretary, Higher & Technical Education; V. Lovitoly Sema, NCS, Additional Secretary, HTE & Ex-Officio Director, Higher Education;

Sentiyanger Pongen, Additional Secretary, HTE & SPD, RUSA/PM-USHA; Government Colleges 17 nungi Principals tem aser Higher Education nungi ketdangsurtem iba mungdang nung dena liasü.

Iba mungdang mapang Minister Temjen Imna Along-i Higher Education Attendance & Record Tracking (HEART) App sayatsü, koba kakets reju ketdangsuba aser achayangba tashi itshitsü nükjidong nung yanglubä lir.

HEART App nungya tesayurtem attendance atema facial biometric aser geo-tagging features amshir, colleges nem osang tejangja porokshir, kakets reju inyaksangshi reprangteter aser project monitoring systems atema kaketshir enrolment data yuteter.

Iba mungdang nungsa Minister-i "Quality Enhancement Report 2024-2025" sayatsü, koba ajanga Department-i Nagaland nung aliba Government Colleges tem temaba jenjangi

ajungkettsü asoshi tanen makai meranga inyakba sayur.

Kasa mapang institutional performance nung alakteta shilem tajung agiba mechi tesayur pezü aser ministerial staff asem nem Departmental Meritorious Awards agüja liasü. Item sempet ya Dr. K. Nishena Nekha, Additional Director, Higher Education ajanga pei college principals nem amokja liasü.

Iba mungdang nung Vetanule Demo, OSD, Higher Education menden liasü aser sentong tenzüka Dr. Vitsosie Vupru, Principal, Kohima College Kohima ajanga sarasadem.

Sarita Yadav, IAS, Secretary, Higher & Technical Education aser V. Lovitoly Sema, NCS, Additional Secretary, HTE & Ex-Officio Director, Higher Education natia iba sentong nung jembä aser Er. Rishav Sethi-i department app "HEART" indang rateta ashi aser mongdang tembanga Rokono P. Keyho, Joint Director, Higher Education ajanga melepzüng o jembä.

Nagaland sempet ajunga lapoktsü atema Abu Metha-i ayongzük

Kohima, Rongchii/April 30 (TYO): Nagaland atema tejakleni aotsü mangdang aser terenlok asoshi lungjemer inyaksü nüngdaker, anungji sorkar, corporate aser civil society tsüngta tajungba nung lungjemer state indang sempet ajunga lapoktsüla, ta Abu Metha-i ashi.

'Corporate Social Responsibility (CSR) compliance & Foreign Contribution (Regulation) Act' indang anogo ana Capacity Building Training tenzüka sentong nung jembidang, Nagaland ya India-Myanmar arütsü nung tongtipang tesem ka lir aser India indang Act East policy kübok Southeast Asia leni aoba süngkum ka ama akumtsü nüklä lir, ta Advisor to Chief Minister & Chairman, Investment and Development Authority of Nagaland (IDAN), Abu Metha-i ashi.

Economic regions sendaktepba aser lenla balala nung anir aintsü asoshi state-i tongti shilemagitetsü, aser iba atema institutions teka amteper inyaksüla, ta pai ashi.

Pai stakeholders ajunga dang grassroots aser talisa meta talang nung tesendaktep aser

infrastructure tebilemtsü alidak terenlok bener arutsü atema "Team Nagaland" ta nüngja agütsütsüsa lungjemer inyaksü ayongzükä liasü.

State nung urban centres tem terenlok aliba angur, saka regions telunglen tang tashi temulung agütsütsü nüngdaker, ta pai ashi.

Metha-i tongtipang sorkar departments, talisa health, education aser social sectors nung CSR cells balaka lapoka corporate mapa inyaksü aser development projects atsür arutsü asoshi inyaksü ayongzük.

CSR yagi maongka jenti agütsür, saka 'project pitching, compliance aser documentation' ama timtem ajanga maneni item mapa asangsang kuma inyakba nung tetsükdaksü agütsür, ta ashi.

Metha-isa bendang lima nungi sentötsü teyari angutsü atema FCRA nungteimla aliba indang ashi aser tim masüba lenmang nung amshiba nungi kumzüksü asoshi ochishia inyaksangshisü nüngdaker, ta ashi.

Sentong nung Additional Secretary, Finance Department and IDAN, Vineet Kumar-ia iba

sentong ya mapang shidak nung agir ta ashi aser CSR ya angati teyari agütsüba ka ama masü saka loktiliba melenshitsu atema hadir ka kumogo, ta ashi.

Paia sorkar, corporate aser NGOs tsüngta telungjem nung inyaksü tongtipang ta ashi.

Manager, HCL Foundation, Rahul Kumar-i senotsü teyari agitsü atema 'compliance knowledge' kanga tongtipang lir, aser ozüng shidak mangatetibo maongka liaka senotsü teyari magitetsü, ta ashi.

Iba sentong nung Deputy Director, Ministry of Home Affairs, O.P. Singh-ia NGOs temteinyaksü indang jembä liasü.

Iba training sentong ya IDAN-i Ministry of Home Affairs aser HCL Foundation den lungjemer ayongzük.

Anogo ana sentong ya ajanga mongintem aser sorkar indang departments 15 nungi ketdangsurtem lungjemdakja Nagaland nung meta talang tashinung oa terenlok mapa inyakba tali tajungba kumdaksütsü asoshi shisa lemsateper.

Mokokchung aser Dimapur nung 8buba NEPEX ayongzüka agiogo



Mokokchung Mock drill

Dimapur, Rongchii/April 30 (TYO): Lendong balala atalokba mapang renema alitsü asoshi District Disaster Management Authority (DDMA) Mokokchung aser Nagaland State Disaster Management Authority (NSDMA) na longjemer April 30 nü 8buba Nagaland Emergency Preparedness Exercise (NEPEX) ayongzüka agiogo.

State ajunga nung ayongzüka agiba mock drill ya tsüingsang kanga majungba mapang 7.7 magnitude menoknok ka anokba ama agia liasü. State nung Incident Response System (IRS) tendangtsü, department tem tsüingda tesendaktep tajungba kümdaktsütsü aser Standard Operating Procedures (SOPs) asüngtetshitsü nükjidong nung iba inyakyim benoka inyakogo.

Exercise ya anepdang 8 ako nung siren ola agüja tenzü. Iba sülen Deputy Commissioner & Responsible Officer (RO), Ajit Kumar Verma, IAS-i IRS activate sütsü aser District Emergency Operation Centre (DEOC) staff tem jaoka liasü.

Search & Rescue: Government

High School (Dilong), IMDH Building, aser DC's Office Building.

Infrastructure: Mokokchung yimtsüing nung anentsüh aluba ka yatok.

Logistics: Imkongmeren Sports Complex ya Central Staging Area liasü.

SDRF, Fire & Emergency Services, and Medical team tem densema Incident Response Teams (IRT) tem teküzmzüka maparen balala atema anidena liasü.

Inyakyim ya Incident Commander ama SDO (C), Operations Section Chief ama District Commandant (HG, CD & SDRF) aser Staging Area Manager ama AEo nungeri achaayanga liasü.

Tatalokba metetdaktsütsü atema Dilong school tesem ya NSDMA-i 10 ako nungi live sayua liasü. 11:30 ako tashi nungbo IRT ya Staging Area nung demobilize süa liasü.

Kasa mapang nung Dimpur nunga 8buba Nagaland Emergency Preparedness Exercise (NEPEX) 2026 ya ayongzüka agiogo. Iba sentong ya District Disaster Management Authority (DDMA),

Dimapur-i ayongzüka agia liasü.

Mock drill ya 7.7 magnitude menoknok ka anoba ama agi. Exercise mapang DC Office (Staging Area) Government Higher Secondary School, Purana Bazar, Hollotoli School, Naharbari. Westside Store, Darogapathar, Indian Oil (IOCL), Kevijau aser PHC Purana Bazar nung nung tatalokba balala atalokba mapang koda jenjang agitsü iba dak ajemdaker inyakyimtem benoka inyaka liasü.

Iba exercise asadanger Dimapur, Chümoukedima aser Niuland Commissioner of Police, Aotula T. Imchen, Deputy Commissioner of Police (Traffic), Meren Chenth nati temelenshitsü mesüra tebendenloksü alibattem lemsatet aser drill takok ngua agiba atema tenüingsang agüja liasü.

Iba inyakyim ya DC Dimapur, Dr. Tinojongshi Chang-i anküp o jembiba sülen tembanga liasü. Pai NEPEX 2026 takok ngua agitsü atema observer, officer, personnel tem aser Team Better Dimapur nungeri teyari agütsüba atema parnok dang kanga pelaba lemsatet.

VBDAN züingsemtemi Angh den ajurutep

Dimapur, Rongchii/April 30 (TYO): Voluntary Blood Donors Association Nagaland (VBDAN) züingsemtemi Nagaland Angh Nand Kishore Yadav den Lok Bhavan, Kohima nung April 30 nü ajurutepogo, shiba VBDAN Chief Patron lir.

Angh Nand Kishore Yadav-i, nüsung taküm küzmzüksü atema iba mapa tajung benoka inyakba aser state ajunga nung azü tenla agütsüdaktsütsü atema meranga inyakba asoshi parnok nem tenüingsang agütsü. Paisa, iba amala mapa tajung ajanga healthcare system akangshiba aser mezüingdangtet nisung

taküm küzmzüksü nung tongtibang shilem agir, ta ashi.

Azü tenlaba ya tenla ajak rongnung tetezü takettiba ta shia Angh-i iba lokti tentet dang nüburtem aser talisa lanurtem nem maneni tangazükba agütsütsü ajungshia liasü, koba ajanga Nagaland nung pei mulungka nung azü tenlaba sobaliba ka tentetdaktsütsü, ta ashi.

Sensaksem mapang VBDAN züingsemtemi parnok inyakyimtem indang metetdaktsü, kong pei mulungka nung azü tenlaba camp tem, awareness

sentongtem ayongzüksü aser district balala nung tenla agütsürtem tsüingda tesendaktep takang ka yangluba densema lir.

Parnokisa Angh nem Blood Donors app indang metetdaktsü, koba download asütsü atema Android app store nung angur. Parnoki iba ajanga züingoksema aliba tenla agütsürtem den koda kara tongtepratepteter, jongdak mapang koda sendaktepa inyakteter aser blood bank aser shiranger na tsüingda tawa aliba süngdaktsütsü atema koda teyari agütsür iba indang rasa ashi.

Nagaland nungi gitar atemer ana FGN Guitars-i Endorse asü



Dimapur, Rongchii/April 30 (TYO): Nagaland nung kenten menü nung alizüing tasen ka tongteta Trance Effect kentenba telok nungi gitar atemer Takotemjen Chang aser Temsujungba Jamir na Japan nunger gitar yanglur FGN Guitars koba dang Fujigen ta-a ajar, iba company yagi endorse

süogo.

Iba brand ya 1960 nung amenok aser parnok mapa kanga ajungba atema alima ajunga nung kanga nüngtugu lir aser parnok alima nung gitar label tajungtibatem den longjemer inyakogo.

Chang aser Jamir naprongla yagi gitar kanga junga atemer

aser tena Lollapalooza India nung shilem agiba, Def Leppard amala nüngtugu kentenba telok den sabang ka nung shilem agiba aser Southeast Asian nung kenten benjung tulutem nung shilem agiba ajanga ajaki tali jangja kümogo.

Kentenba dak sendakba nung Chang yagi blues aser funk yimya nung atemer aser Jamir-i alternative aser grunge kentenba yimya amshia atemer aser iba ajanga Trance Effect pur kenten yimya tebur jungdaktsür.

FGN-i endorse asüba ya gitar atemerem atema alizüing tasen ka tongteta dang masü saka Nagaland asoshi nemadangtsü mapang ka lir, aser iba ajanga alima nung kentenba luyim nung state-a tangari meteta küma aoba sayur.

ICFAI University kaketshirtemi Nagaland University Library semdang

Medziphema, Rongchii/April 30 (Agencies): ICFAI University, Nagaland kübok Department of Library and Information Science nungi faculty ka aser kaketshir tekui parnok indang academic field study nung shilem ka ama Brehostibarnü Nagaland University indang Medziphema campus nung SASRD Library semdangogo.

Kaketshirtem nem modern library system, service aser ketdangsuba indang tsüingdong oa tangazükba agütsütsü nükjidong nung iba sentong ya ayongzüka agiogo. Library semdangba mapang kaketshirtemi reference, circulation, automation aser digital resources ama library nung section balala semdanga liasü.

Parnok dang Online Public Access Catalogue (OPAC), cataloguing, classification aser library automation hadirtem amshiba yimya sayua liasü.

Maneni iba sentong ajanga library professional tem den ajurutepba sensak asemstü atema kaketshirtem nem maongka agütsüogo aser anogoshia academic library achaayanga indang aser iba mapang tetsükdaktsü ajangshibattem indang shisatsü ngua liasü.

Library semdangba ajanga kaket nung angazükba ya asangsang nunga ajangshia angazüktsü asoshi kaketshirtem nem maongka tajung agütsüogo.

Ali kiburtem senden ayonger

Dimapur, Rongchii/April 30 (TYO): NH-29 nung pei temeden mongui aliba ali kiburtem (Purana Bazaar nungi Chumukedima tashi) May 2 nü 3 ako nungi tenzüka Hotel Saramati, Dimapur nung senden ka amentsü ta metetdaktsüogo. Lenmang agi kongshir aliba ali kiburtemtebilemstü lemsatepsü asoshi iba senden ya ayongogo.

Iba dak sendakba nung züingsem ajak dang tamakok

maludaktsü iba seden nung adentsü mepeshia metetdaktsüogo, kechiyong ali kiburtem yongtsü nung telemdang mesüra mangatettep kecha madokdaktsüner.

Maneni züingsem ajak dang parnok ali patta (cadastral mesüra non-cadastral) photo copies anana bener arutsü metetdaktsüogo, koba mangaoka ayutsü aser verification atema asütsü.

Lenti Aier-i SUNY Chancellor's Award angu



Lenti Aier den State University of New York (SUNY) Chancellor John B. King Jr., aser Associate Provost for Student Success, Empire State University Seana Logsdon nunger tangokba noksa nung angur.

Dimapur, Rongchii/April 30 (TYO): Lenti Aier nem April 27 nü Chancellor's Award for Student Excellence, 2026 agütsüogo. Iba award agütsüba sentong ya Albany Capital Center, New York nung agia liasü. Shisaluyim nung temaba jenjang tongtetba aser University lokti nem teyari agütsüba atema la nem iba naroküm agütsüogo.

Iba naroküm ya New York State nung University-i college aser university 64 nung azüingba kaketshirtem tem agütsüba tematiba tetushi lir.

Shisaluyim, lenisüba diversity, equity, inclusion, justice; research & development; campu nung shilem agiba; civics & service aser arts (creative or performing); len anitsü sempet aliba, campu nung aliba lokti nem meyipa agütsüba aser campus nung külem kaketshirtem atema nükdangdong ka akümba amala lenla balala asadanga sülen SUNY kaketshirtem nem iba

naroküm ya agütsür.

Lenti Aier ya Empire State University, Saratoga Springs, New York nung kaketshir ka liasü. La 2026 küm May 20 nü Master of Science in Applied Behavior Analysis bener graduate asütsü. La indang GPA 4.0 lir aser Behavior Analyst Certification Board (BCBA) aser New York State Licensed Behavior Analyst (LBA) atema candidate ka lir.

La taoba mapang Devereux Foundation, New York nung Assistant Program Manager ama inyakogo. Iba Foundation yagi U.S ajunga nung autism, intellectual/developmental disabilities, aser emotional/behavioral differences keta aliba nisungtem nem teyari agütsür. Program tem rongnung kidang treatment agütsüba, day school, aser lokti dak amendaker anepaluba densema lir.

Kasa mapang nung Lenti Aier ya Act Of Kindness Society, Dimapur ngutetla aser tir lir.



April 30, 2026 nü Jammu district nung Union Railways Minister, Ashwini Vaishnav-i Srinagar-Katra Vande Bharat train semzüksütsü lia tanurtemi linük wako amer aliba noksa nung angur.

Sultanpur, UP nung yipru lendong nung nisung tenet asü

Sultanpur, Rongchii/April 30 (Agencies): Uttar Pradesh kübok Sultanpur district nung ajungben yipru tesashi aitba aser tzüinglu aruba lendong nung tanur ana densema nisung tenet asü aser nisung 21 yiru, ta ketdangsertemi metetdaksü. Sultanpur district kübok Baldirai, Haliyapur, Akhand Nagar, Bandhua Kala aser Kudwar nung ajungbena tzüinglu sashia aruba den külemi yipru tesashi aitba ajanga ki aika chirep aser süngdong aika lao.

Kudwar nung electric light indong ka laoba lendong nung arrshi küm 20 tebur ka asü, Baldirai nunga süngdong laoa ki chirepba lendong nung arrshi küm 8 tanur ka aser arrshi küm 58 tebur ka asü. Haliyapur nunga ki chirepba lendong nung tanur tetsü ka asü aser Akhand Nagar nunga ki chirepba lendong nung arrshi küm 8 tebur ka asü. Bandhua Kala nung süngdong laoa ki chirepba lendong nung arrshi küm 40 tetsü ka asü aser Kurebhar

nunga ki chirepba lendong nung arrshi küm 70 tantsür ka asü. Iba dak alia nisung 21 yirua hospital balala nung mongdar. District Magistrate, Inderjeet Singh-i ketdangsertem dang ghonda 24 tsüngda State Disaster Response Fund nungi takoksa angurtem nem teyari agüjang, ta tuyuogo. Ketdangsertem isa nüburtem dang tsüngsang-mopung osang metetpelaa alitsü aser tsüngsang majungdang kidang nungi mayazüksü metetdaksü.

Bangladesh nung measles proker; India-a kongshitsüa akok: WHO

New Delhi, April 30 (Agencies): Tang Bangladesh nung measles wara pokteta tanurtem teimba ser nisung 250 dak tali süogo; iba wara ya proktsü kanga melamelar anungji India aser Myanmar ama kidanger linüktem nunga prokshitsüa akok, ta World Health Organisation (WHO)-i tekümdangtsü metetdaksüogo. WHO-i ashiba agi, Bangladesh nung district 64 nungi 58 nungbo measles poktetogo; iba linük nung measles vaccine kanga agüja liasü saka tesüiba küm ana tsüngda vaccine kanga mamshiba ajanga melamela iba wara pokteter. Osangbener den jembidang senior virologist Dr Jacob John-i, Bangladesh nung iba wara poktetyonga India nung

poktetsüasabo masü, kechiyong iba wara anema vaccine kanga amshioogo, ta metetdaksü. Dr John ya India Expert Group on Measles-Rubella (IEG-MR) nung co-chairman lir. India sorkari ashiba agi, linük nung measles-rubella vaccination mezüngbuba dose ajanga shilem 93.7 ayimjemogo aser 2024-25 küm tanabuba dose agi shilem 92.2 ayimjemogo. Ajisüaka WHO-ibo, Bangladesh nung iba wara sashia poktetogo, anungji iba region nung aliba linüktem jenbua mali, ta metetdaksü. WHO-isa, Bangladesh yimtiba Dhaka aser Chattogram aser Sylhet yimtitem ya bendangertem oli-oraba tiyongtsü tesemtem lir, anungji talisa vaccine magii ainlen

senzürtemi iba wara proktsüa akok, ta metetdaksü. WHO-isa, Bangladesh kübok Jashore aser Chapainawabganj ama yimtitem yabo India arrtsülen lir, anungji senzüsempogertemi iba wara prokshitsüa akok, ta metetdaksü. Measles yagi tanur-tain ajak kongshir, ajisüaka talisa tanurtem kongshir. Iba wara atongba sülen anogo 10 sülen ang wara temaitsütem adoker, aser item temaitsütem rongnung neptzü ayangba, temang metaba, tenük nung tziü atzüngba aser tebang telung nung mesüng-mesünga atenba densema lir. Iba sülen anogo ishika lir tejak nungi tenzüka merem-merema küplen adoktsü aser ibaji temang ajak nung prokshir.



April 30, 2026 nü Uttar Pradesh kübok Bulandshahr nung nisung asem tepsetba tesem nung police-i kuli bushisüngdangba noksa nung angur.

OFFICE OF THE
MERANGKONGTSÜR TELONGJEM TULI
 Dist. Mokokchung, Nagaland - 798618
 Nükjidong: "Telongjem Aser Teyaritep"
TENÜNGSANG ASER TETUSHI AGÜTSÜR

Merangkongtsür Telongjem Tuli Unit ajanga Merangkong Senso tajung shirnoki sa meranga azüngba wadang balala nung takok tulu anguba ajanga sensosanger nem konang, tetushi bener arutsüogo nenok ajak dang kanga pelaba lemsateper.

1. Wb. Imlituba lmsong aser Wt. Tialila na jabaso **Sp.Lipoktoshi** Probationary Officer (PO), Canara Bank.
2. Wb. K.Imlitemjen aser Wt. M.Amenla na jabaso **Sp. Er.Tsuknungmeren** Junior Engineer (Electrical Engg) Power Department, NPSC Combined Technical Service Examination (CTSE) 2025.
3. Wb. S. Amongba aser Wt. Senlimongla na jala **Kr. Dr. Nokpanginla** MBBS Course under NEIGRIHMS, Shillong, North Eastern Hill University, Shillong, 2025. One year compulsory Rotatory Medical Internship 2026.
4. Wb. Meyidangit aser Wt. Moanaro na jabaso **Sp. Benjungakum** - Top 9th (91.60% - Science Stream) NBSE, HSSLC, 2026. Iba den külemi Merangkong Senso tajung kwi kati HSLC aser HSSLC nung takok tajung ngugo nenok ajak tang pelaba lemsateper.

Sd/- **K. Tamsunaro** President, MTT
 Sd/- **Moamongla** Secretary, MTT

Karnataka nung Chief Minister memelentsü: Mallikarjun Kharge

New Delhi, April 30 (Agencies): Brihostibarnü Congress Tir, Mallikarjun Kharge-i, tang tashi nungbo Karnataka nung Chief Minister melentsü tebilemba mali, ta metetdaksü. May 4 nü state pezü aser Union territory ka, iba denji Karnataka nung menden ana atema by election agiba osang sangdongba sülen Karnataka nung tongti lenir melentsüa akok aser cabinet asetshitsüa akok, ta olulu proker.

Karnataka nung Deputy Chief Minister D.K. Shivakumar pusemertemi pa Chief Minister kümdaktsütsü atema Central lenirtem dang akhanger. 2023 küm Karnataka nung Congress sorkar tasen akümba mapang nung Chief Minister Siddaramaiah aser Sivakumar na menden melentepa abentsü atema bangjema lir, ta shia Shivakumar nem CM menden agüjang, ta parnoki akhanger. (Maneni tapak 8 nung...)

Trinamool Congress-i menden 226 dak tali angutsü: Mamata Banerjee

Kolkata, April 30 (Agencies): Brihostibarnü West Bengal Chief Minister, Mamata Banerjee-i, exit polls osangji tai, kechiyong May 4 nü vote azüngba sülen Trinamool Congress-i West Bengal nung sorkar akümtsü, ta metetdaksü. Laisa, TMC-i menden 226 dak tali angutsü, ta ashi. Mamata Banerjee-i video ka ajanga, "Onoki Tetsü-Litsü-Nüburtem sorkar akümtsü. Tepela Joy Bangla!" ta metetdaksü. Laisa April 23 aser April 29 anogotem nung kanga tatsük süaka nüburtem aikati vote agütsüba atema pelaba lemsateper.

300 tashi nung takok angutsüa akok; 2026 küm onoki menden 226 dak tali angutsü. Ibaji onok tamang. Yashi parnoki iba ya 'Godi media' ajanga inyak. Parnoki ED aser CBI amshia ajak amokmerener ta nenoki meteta lir. Central sepaitema tim mesü amshioogo, aser kü kübok maliba police officers tasenpurtemi tetsür-tanurtem dak-a tashiyim amshioogo, ta lai metetdaksü. TMC nung inyakertem dak azükba mapang la-a liasü, ta lai ashi. Mamata Banerjee-i, counting centres-i EVMs bener aoba mapang BJP nung inyakertemi melenteptsü merangogo, ta shia lai TMC nung inyakertem dang lai tetuyuba magütsü tashi counting cabins toktsür maotsüla ta shioogo, ta metetdaksü.

"Central sepaitem aser local sepaitem longjemer inyakaka, India sorkar nung Ato kilonser aser Home Minister na nungi tenzüka state 19 nungi minister tem longjemer inyakaka, senotsü tashi amshiaka, tashiyim amshiaka aser Bengal nung nüburtem songtemtsü atema sepaitem amshiaka Bengal nung merangertemji ballot box nungbo tamakok ngudaktsüogo," ta lai ashi. West Bengal Chief Minister-isa, Bodhbarnü sangdongba Exit Polls osang ya Bharatiya Janata Party Office nungi lir, aser iba kuliji la ket nung lir, ta metetdaksü. "TMC-i menden 200 nungi

"Yimjung nung liang aser kü dak tamang kaang. TMC-i dang sorkar akümtsü. Ni administration dang party nung inyakertem dak tashiyim mamshitsü metetdaksür. BJP purtem atema parnok meyong agents maliasü, anungji Amit Shah tetuyuba nung parnoki Central sepaitem amshi," ta lai ashi. Bodhbar aonung exit polls ti nungi trokibo BJP-i takok angutsü ta asadangtet aser exit poll anati dang TMC-i takok angutsü ta asadangtet.



TIR YIMYIM

YIMOBILEM (EDITRIAL)

DIMAPUR FRIDAY, MAY (MONUPII) 01, 2026

Rupee Jenjang

- Tangsen Lemtur

Brihostibarnü (April 30, 2026) India nung sen 'rupee' America nung 'dollar' sen den medemdangra dollar 1 ji India nung senbo 95.34 kümogo; iba ya osang tajung ka masü kechiyong India nung sen jenjang tamajungba akümba ajanga bendanglen nungi alizükba osettsüset balala, talisa toztü jenjang ano tang dang nungi tasakba akümtsü, kechiyong India-i linük nung nungdakba toztü shilem 80 bo bendanglen nungi dang alizüker. Finrex Treasury Advisors LLP Director, Anil Kumar Bhansali-i, "Rupee jenjang tamajungba akümbaji toztü jenjang maneni atuba agi lir; toztü barrel ka nung US Dollar 120 kümogo aser maneni atutsüa akok, kechiyong US-i maneni Iran nung tzyim lenmang nokdang aser Iran-ia 'Strait of Hormuz' ajanga rong mesüidaktsür," ta metetdaksü. Tawa Union Finance Minister, Nirmala Sitharaman-ibo, tang terenlok dak linüktem den medemdangara 'rupee' jenjang junga dang lir ta ashi. India nung petrol aser diesel jenjang atuba shia aonsotsü aser osettsüset jenjang-a atur. Tang Middle East nung rara ajanga toztü jenjang tasakba küma linük aika nung toztü jenjang kanga tuogo, talisa Vietnam, Nigeria, Laos, Brazil, Mexico aser Colombia ama linüktem nungbo toztü jenjang kanga tuogo. Tang tashi nungbo India nung toztü jenjang matu aser Petroleum Ministry-ia toztü jenjang atutsü tebilemba mali ta shiogo, ajisüaka tanga linüktem nung ama toztü jenjang tura sensakertem tamajungba kongshitsü. India nung 'rupee' sen tapuba akümba ya talisa West Asia nung rara ajanga lir. Küm 15 tejaklen (2011) Centre nung taoba mapang UPA sorkar alidang dollar sen 1 ji India nung sen 44.17 liasü saka tanübo dollar 1 ji India nung senbo 95.34 kümogo. Yamaji India nung sen jenjang tapuba-tapuba akümba agi tanga linüktem nungi sen ishikati oset alia bener arubato India tongerbo sen aika agi alir; tetezü, tangalen sen dollar 100 agi smartphone ka ali nung India nungbo kasa phone ji sen 9,500 agi alitsü. Tanü takar linüktem den India rongsenkettsüng medemdang dang India nung sen jenjang tamajungba akümbaji sensakertem asoshi shisabulutsü ka lir. 2016 küm Centre sorkari demonetization benokba, 2017 küm GST benokba aser 2020 küm nungi coronavirus wara ajanga India nung rongsenkettsüng jenjang tamajungba aküm, iba sülen linük rongsenkettsüng asentenshiba mapang ano tang Middle East tensa ajanga rupee jenjang ano tamajungba akümer. International markets nung tanger den tokteptsüsa India nung osettsüset meyangluteter. Ano kuli rongnung kaji shishilembaba 'trade deficit' (India-i bendang linüktem dang ayokba dang nungibo bendanglen nungi alizükba teimba) jenjang majungba ajanga lir, anungji sorkari mapatong tasen benoka inyaksü nungdaker. Opposition nung alidang Ato kilonser Narendra Modi-i rupee jenjang tajemba akümba atema sorkar aija aruogo, ajisüaka pa yimsüsüba kübok tanübo dollar sen 1 ji India nung senbo 95.34 kümogo. India nung rongsenkettsüng jenjang ano tamajungba akümtsüa akok, toztü jenjang tupet atutsüa akok, chiyungtsü nungi tenzüka osettsüset ajak nung jenjang tupet atutsüa akok aser rupee jenjang ano tamajungba dang akümtsüa akok; iba atemaji sorkari asalentong balala benoka inyaksüba dak alaka asenokibo kecha meshitettsü.

OLEMSABANG

NLTP ACT 1989 AJANGA NAGA KHRISTANTEM TELOK ANA LEMSAR OTIA RARATEPPER

- K. LIMA LONGKÜMER

(Yashi adok nungi...)

Asenoki züzüa toktsübayong jogo Lucifer telok nungi Nefelim purtua tashetait acünungji Naga nung ajak mesüzüktsü par düzü nungi yimyim ayimmoktsür ta angateti. Asenoki mekümdangra item telok yagi Nagaland akoktsü, idangji Nagaland nung Arogotem-a anakshitsü, jogo shinba ama alima tatembang kati asemmer. Küm meyi ana sülen ta ashibadu jogo 2026 nung ilongdaki. Aor tamanger dak temenenden raratsü tashe mali, shidakbabo asenok ya Khrista tsüngchir macü saka olabo olurasa ayimmoktsü iba jagi mojing ain adok asenoki makok daküm pungu pai tepsetter ter dak tema daküm lemtahtsür lir, asenok ya shidakba tamanger macü, tamang shidak ali-acüba asenoki mojing ajemzükka yoktsüba. Aor tamangertem ya tamang jibi-jang katah mali ta tang nungi angateti. Ao Naga nung ya shiba dak amanger ta nibo chichia asüngdang mapamatenba nisungi Khrista Arogo repranger. Tamang mapamatenba ajanga inyak acünungbo yi nokdangba ajanga 50% bo takok ngua inyaktetta lilah. Shemang ang macü tanela-a aeka kümzükker lilah. Menur acüyonga aser tang danga asenoki atangjila mapamatenba inyakra asenok dak yi yoknürtemi akhüm kütta reprangtsü, mapamatenba tamanger-ji tamang tasü ta angatetter. (Mapamatenba medene tamang tasü).

Aor dang ni shinübaji asenok ajaki mapamatenba asem (3) danga inyaktetra 50% bo daküm kümzüktsü. Saka mapamatenba maka ou dang jempia ajia toktsüra nisung kata mekümsüktsü.

Yi ayokker aliyongjia bi sasa yutsütsüsa mapamatenba inyaksü lenmanga lir.

1. Asenoki mapamatenba inyakra parnok sasa toktsütsü.
2. Yi tashidak mekaoba tajangzük, Nisung aeka renloktsü.
3. Asenoki mapamatenba inyakra shinga shisabulu makatsü iba den tanela ajangzüktsü. Mapamatenba agi inyaksü nübu ayongtenra shesatsü den rongsen tenlar alitsü. Mepushiba agi tangashe Aor tangatetter aeka lir-go.

Dimapur nungi Civil Society Organization purtumi Chief Minister dangi shitizülua yoktsü ta parnok newspaper nung adoktsüba asenoki züngugo, anungji aji mapamatenba mekümdaktsütsü asoshi asenoki tamang mapamatenba ka inyaka sayutsü asoshi mezüngbuba nung Peace Prayer slogan Rally sentong Nagaland ajunga nungi adenshia Dimapur nung sentong tulu ka ayongzüktsüla, aser sentong ayongerji Dimapur District nung aliba Pastors fellowship den ordained Ministry fellowship-i yariteppa iba Peace Prayer slogan Rally (PPSR)-ji memenu akatsüla Asenok tsüraportemi tasü-maken hapta aeka Kohima nung lumia sarasademba ajanga tanü Nagaland nung NLTP ACT amenoktetba ya parnok daküm ajunga bendanga agütsür inyaktetba ajanga tanübo asenoki koba telok den sütir süaka ozüng dak metalokker satok-satokka inyaktettsüba ozüng yua lir, kecha tetsübuttsü mali tarendaktsüa mali satem-satemma inyaktettsüba mapamatenba renemja kar. Asenoki shinga tsübuttsü mali. Asenok Naga nung nüchipur asoshi NLTP ACT 1989 8 shingaia makintettsü mapamatenba inyakdi. Iba PPSR mesüra maparen kar tenzüka muotetra jogo Nagaland nungi NLTP ACT 1989 ya akinang ta ABAM aser NBCC-i ashitsüla. Medical aser Education Department yi nungi Revenue angubadang macü Arogoa senbong denna melemtsü. Tang tashi Naga Khristan |Mungdangtem ajangabo ozüng ya makintsü olabo adoktar. Telok ana lemsar otia rarateppa rongnung koba nung asenok-a adentsü.?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Spain Evangelical telok kati Arogo tasen 100 tenzüksütsü



April 23-26 anogotem nung Spain kübok Cullera yimti nung Federation of Independent Evangelical Churches of Spain (FIEIDE) conference nung adener pastor tem, missionary tem aser Arogo nung lenirtem tangokba noksa nung angur.

Rongchii/April 30, 2026:

Spanish evangelical Arogo federation kati taruba küm ter tsüngda (2036 küm tashi nung) linük tesem balala nung Arogo tasen 100 dak tali tenzüksütsü atema telemtetba agiogo.

Evangelical Focus-i ashiba agi, April 23 nungi April 26 tashi Cullera yimti nung pastor tem, missionary tem aser Arogo nung lenirtem 270 adenshia Federation of Independent Evangelical Churches of Spain (FIEIDE) conference nung aden.

Iba federation nung Arogo 100 dak tali lir aser linük tesem balala nung mission points lir.

"Arogo 100, mission I" omen nung ajemdaker iba conference ayongzüka liasü.

Sentong ayongzükertemi ashiba agi, 2036 küm tashi nungbo FIEIDE den affiliate asüba Arogo anasü agi tali akümtsü nükjiong nung iba telemtetba agi.

Talisa northern Spain aser central Spain nung aliba jila aser counties kar nungbo evangelical Arogo ka danga mali, anungji item tesemtem nung Arogo tasen tenzüksütsü nükjiong nung iba telemtetba agi, ta Evangelical Focus-i

metetdaksü.

Iba conference nung FIEIDE Tir, Francisco Mira-i "Antioch Fund" tenzükba osang metetdakja liasü. Iba fund ya taruba küm ter tsüngda Arogo tasen tenzüksütsüba aser longjemer inyakba mission project balala nung amshitsü.

1957 küm Arogo ishikati FIEIDE ya tenteta liasü aser iba evangelical federation yagi Laishiba ya atangji Tsüngrem O lir ta shia mission wadang tulu inyaker.

FIEIDE nung züngsem Arogotem ya nija tashi aliba Arogotem lir, ajisüaka Arogotemi longjemer ministries aser mission project balala inyaker.

Akhidang nungi Spain ya Roman Catholic linük ka liasü, ajisüaka tesüiba küm aika tsüngda secularization ajanga tangbo tanga denominations-a aika adokogo. Iba linük nung Evangelical Protestants ya tang tashi nütsüng ajema alirtem lir.

Iba conference nung nütsüngsütsü, Khrista osangtajung proksü aser local Arogotem renloksü atema o lemtepogo.

Iba conference nung o jembirtemi Tasen Lai nung aliba

Arogotem nungi atishia jembia liasü; talisa Yirusalem, Antioch aser Thessalonica Arogotem atishia jembi.

Iba conference nungsa telok tilala lemsar Khrista dak mamangertem den tesendaktep yanglutsü aser Arogotem nung outreach atema jembi.

Marcos Zapata-i video presentation ajanga item onük jembi aser German mission organization Allianz Mission nung Director, Thomas Schech-i Arogotem tsüngda amalitepa inyaktsü aser mission mapa atema kasa mangdang ayutsü ayongzüik.

Arogo tasen aika tentetsütsü atema o lemtepba dak alia lenirtemisa FIEIDE indang ministries- Evangelical School of Theology-i pastoral training agütsüba aser lanurtem nütsüngsüba "Misión Posible" indang metetdaksü.

Evangelical Focus den jembidang FIEIDE coordinating secretary, Rubén Miyar-i, "Nütsüngsüba onük, Germany nung aliba Arogotem atishia jembiba aser o lemtepba ajanga sentong nung adenertem aika ajungmesoogo," ta metetdaksü.

2027 küm FIEIDE-i küm 70 ajungbamong amongtsü.

Manipur nung Khristan tribal teloktem tsüngda ken o jembi tenzükogo

April 30, 2026: Lisopur Arogo lenirtemi Manipur nung Kuki Khristantem aser Tangkhul Naga tribal teloktem tsüngda yimjung ken o jembitsü atema ketdangsia inyaker.

Nagaland nungi Arogo nung lenirtemi Manipur nung tribal Khristantem tsüngda telongjem alitsü atema mera agia inyaker, ta Arogo nung lenir kati metetdaksü.

April 29 nü osangbener den jembidang Arogo nung lenir jagi, April 27 nü Naga nung lenirtemi Manipur kübok Kangpokpi jila nung Kuki lenirtem den senden ka ayongzüka menogo, ta metetdaksü.

"Mezüngbuba sendenji takok ngua agiogo, aser telok anapronglai May ita

mezüngbuba hopta nung maneni ken o jembitsü melungogo," ta paisa metetdaksü.

Taruba sendenji Manipur nung masü saka tanga tesem ka nung ang ayongtsü, kechiyong iba senden nungji Assam aser Meghalaya na densema northeast nung aliba state tem nungi Arogo lenirtemia shilem agitsü.

Arogo lenir jagisa, kobi melii Kuki-Naga rara ya anentsü imlar, ta ashi.

2023 küm May ita nung Manipur nung rara tulu adokba sülen tesüiba küm ka shi yimjung liasü, saka taküm April ita tetenzüklen Hindu Meiteis aser Khristan Kuki tsüngda asentenshir rara adok.

Ano April 18 nü Ukhrul

district nung Naga nung ana tepsetba sülen tensa tamajungba aküm. Iba sülen ano nisung 10 shi tepsetogo.

2023 küm May ita nung rara adokba sülen tang tashi nung Manipur nung nisung 260 dak tali tepsetogo aser nisung 60,000 dak tali jenshiogo.

Asürtem aser tesem balala nung jenshia alirtemji teimbaka lisopur Khristantem lir.

"Khristantem rongnung maneni rarara ibaji ajanga tensa tamajungba dang akümtsü," ta Arogo nung lenir kati metetdaksü.

Nütsüng million 3.2 aliba Manipur nung nütsüng shilem 41 lisopur Khristantem lir aser nütsüng shilem 53 Meitei nung lir.

ANOGO ABEN TSÜNGREM DEN

Khristan ain adokba

Ain adokba temenen tebenshi. Ne ain adokba manung anü teludaksü. - Efesa 4:26.

Ain adokbai Khristan taküm raksatsüba ama tanga mapai merakatsür. Ain adokbai pei sasa azüokba samatsür aser asenoki tanga mapang nung meinyakba mapa inyaktsü ajungshir. Maneni ain adokba lira, ibaji taku akümer aser asenok mulungjang nung tajung bilemba ajak chimar. Laishiba nung tamangertem dang maneni ain adokba indoktsü aser shi jangraba temenentem rong nung ka ama züngshitsü sayur (Efesa 4:31).

Efesa 4:2 nung shia aliba o amshia asenoki asenok ain adokba metentsütsü aiben meranger! Yisui ain adokba tenla ki meshitetsüba "temeshi ain adokba" ta kuli agütsür. Efesa nung temenen menaba ain adokba indang ashir. Yisui temenen memenai ain adoktsü koka liasü. Kodang Yisui tenla ki meshitetsü, Yisui ain adoka liasü ta Laishibai mashir (Mathi 21:12-14; Mark 11:15-18; Luke 19:45-46).

Laishiba agi asenok ain adokba metentsütsü merangba asenoki kümdangtsüla. Efesa 4:31 nung ain adokba ajak indoktsü asenok nem ozüng agütsü. Iba tetezü ochiba asoshi asenok tangatetba mesüra tejangraba ajak makatsüla ta masü. Iba tetezü koba agi asenok temenen menadaksür item temenentem indoktsü ashir. Ain adokba agi Tsüngrem telangzüka mapa bener marur; iba yagi Tsüngrem mapa tsükdanger.

Mapa kar nung na temeshi ain adoker ta nai bilemra, ne mulungjang nung temenen memenai ain adoker asü masü shisadangang. Ne ain adokba jagi na khristan kati mejembitsü o jembir asü masü mesüra tangar anema miim o jembia senzür asü? Ne ain adokba jagi nai Tsüngrem memeteti aliba yimya atemzüksü adokdaksür asü? Ne ain adok jagi kar dang Khrista mesük temeim mapa inyaktsü noktanger asü? Ne ain adokbaji nai shisadangtsüla aser iba nung temenen kar danga lira indoktsütsü Tsüngrem dang asüngdangang.

Israel sepaitemi Lebanon nung Khristan yim ka tanaben amak

April 30, 2026: Israel IDF-isa, iba tatalokba ya sepaitemi tang agi tanabenbuba onoki jungjung Lebanon nung Khristan bushisüngdangdar aser yimtsüng ka amak; tawa IDF aibelenertem nem temerenshi (Israel Defence Force) agütsütsü, ta metetdaksü.

sepaitemi Yisui Khrista Israel den arrtsülen aliba kürakyanglu ka raksatsüba Khristan yim, Debel nung Khristan yim dak sepaitemi alirtemi, "IDF sepaitemi southern Lebanon nung security zone ka amenokogo, ajisüaka onoki iba tesem toktsür maotsü," ta metetdaksü.

Honibar aonung Lebanon nung Khristan yim, Debel nung Israel sepaitemi solar panels raksatsüba den külemi ki, gari lenmang aser olive sündongtem raksatsü.

Lebanon nung IDF-i pa duty nungi anentsü osangbenertem den jembidang IDF-i, "Item tatalokbaji IDF sepaitem dang tuyuba alema lir

aser sepaitemi yamaji inyaktsü sepai trok anema-a ta meimla," ta metetdaksü. bushisüngdangdar.

AO OSHI ANGAZÜKDAK:

TANÜ ANGAZÜKTSÜBA OJANG



Yange

(n) arem shiruru teti senzüba lenmang (animal's corridor/path)

* Arem nung shiruru yange nokdanga ki meyanglutsüla.

Yanger

(Asameyanga ki mesüra kin yangluba (Building a house or nation)

* Ki ka yangertsü atema oset aika nüngdaker.

OLONG PAITEP # 7490

1			2			3			4
			5		6		7		
8									
			9						
	10								
								11	12
			13				14		
15						16			

TIPLÉN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. ___ adenshi - (4)
- 14. Tsünüsenbongsü adokdak - (3)

OLONG PAITEP # 7489 TELANGZÜBA

TIPLÉN :

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Sujuk, 10. Aonung,
- 11. Dokan, 13. Tinu.

Assam nung ULFA-I züngsem ka, OGWs 10 apu

Dibrugarh, Rongchii/April 30 (Agencies): Tawa upper Assam district tem nung security force balala longjemer meita aoba mapang ULFA-I züngsem ka, overground workers (OGWs) 10 aser temesepba mozü shibelener pezü puogo, ta ketdangtsürtemi metetdaksü. Osang ajanga ashiba agi, meita aoba sentong ya Assam Police den longjemer Spear Corps kübok Indian Army indang Red Shield Gunners-i April ita benoka inyaka liasü. Meita aoba sentong ya Tinsukia, Charaideo aser Sivasagar district tem nung benoka inyakogo.

"TECHINT aser HUMINT nungi osang tejangja angazükba sülen meita aoba sentong ya benoka inyak aser iba mapang ULFA (I) cadre ka, overground worker ter aser temesepba

mozü shibelener pezü puogo. Meita aoba mapangsa temesepba mozütem ngutetogo," ta kasa sangdong ajanga metetdaksü. Ketdangtsürtemi ashiba agi, linük anema inyaksangshirtem dak rangloker jenjang agiba mapang longjemer inyakba ajanga takok tulu anguba iba ajanga sayur.

Parnokisa, temzüng ozüng shitak benoka inyaksü aser nüburtem tekümzüka kübok toktsütsü nükjidong nung item sentongtem benoka inyaker, ta shisem.

Security force-i ashiba agi, telungpur teloktem nung züngsem tasen anisemba nokdangtsü aser upper Assam manokshidaksütsü atema Army aser Assam Police na longjemer inyakba ya ajak dang tongtibtangtiba lir.

Tripura nung tzünglu aser yipru agi ki 4000 dak tema raksatsü; nisung 1 süogo



Tripura nung tzünglu aser yipru agi ki raksatsüba noksa nung angur.

Agartala, Rongchii/April 30 (Agencies): Anogo ana tashi tzünglu kanga sashia aruba den mopung tesashi ona yipru aitba sülen Tripura kübok tesem balala nung teraksatsüba tulu bener arutsüogo, aser yimdklir meyrejang aika dak kongshia parnok tang relief camp tem nung jenoka lir.

Iba lendong nung ki 4,000 dak tema raksaba ketdangtsürtemi asatetogo aser nisung ka asüba den nisung ana yiruba osang agütsüogo.

Asüla ya Dhalai district kübok West Kathalcherra nungi Bajanti Reang ta jangjaogo. La ya April 27 nü tsüngi agi iseta asü. Lar kinungrtem nem sen 20,000 teyari agütsüogo.

Mongolbar anepdang tashi nungbo tzünglu tajemba kümogo, saka state kübok tesem aika nung nüburtem timtem nung lir. Agartala anasa tesemtem densema tesem aika nung power supply raksar lir, kong ghonda 40 shi power magütsüba ajanga nüburtemi longkak ait tenzüka liasü.

Taoba ghonda 24 tsüngda

teyari agütsüba aser yanglushiba maparen tenzükogo. Ketdangtsürtemi tensa maneni asadanga atadar aser lendong agi kongshir aliba tesemtem nem teyari balala lemstüdar. Tang relief camp ana amenoker lir, kong nisung 791 jenoker lir.

State Emergency Operation Centre sangdong ka ajanga ashiba agi, ajak senteper ki 4,191 raksago, kong ki 195 ajunga raksaba, ki 547 kanga mejungi raksaba aser ki 3,449 terara raksaba densema lir. Tang tashi nung lendong agi kongshir aliba kibong 1,243 nem senotsü teyari sen lakh 66.445 bo agüjatokogo.

Maneni yipru yagi electric pole aser school ki amala public infrastructure tem raksatsüogo. Ajak senteper electric pole 129 lao aser school ki 659 dak kongshio, kong ki 69 ajunga raksatokba densema lir.

North Tripura, Dharmanagar subdivision nung ki 136 raksar, Panisagar nung 50 aser Kanchanpur nunga takoksa tulu ajangshio. Unakoti district, Kailashahar subdivision nung ki

518 raksago aser kibong aika nem senotsü teyari agütsüogo. Kumarghat subdivision nunga ki raksar alirtem nem teyari agütsüogo.

Dhalai district nunga Ambassa, Kamalpur, Gandatwisa aser Longtharai Valley subdivision nung lendong ajangshio. Lendong agi Sepahijala district tamajungba kongshi, kong Bishalgarh nung ki 947, Sonamura nung 387 aser Jampujala nung ki 153 raksago. Item tesemtem nung relief camp tem lapoker lir.

Teraksatsüba aika adokaka ayongtem nung tzü kangabo memetsüngi lir. Ketdangtsürtemi Howrah, Gomati, Muhuri aser Manu nung amala ayongtem meita atadar.

Sepahijala district kübok Bisramganj nung tzünglu timba (145.5 mm) aru aser Agartala, Sonamura aser Gandacherra nung nunga tzünglu aruogo.

Weather department-i, taruba ghonda 24 tsüngda state kübok tesem balala nung maneni tzünglu arutsü ta metetdaksüogo.

Dibang Multipurpose Project atema diversion tunnel ana lapokogo



Itanagar, Rongchii/April 30 (Agencies): 2800 MW Dibang Multipurpose Project atema diversion tunnel ana Bodhbarnü lapokogo, koba India nung hydroelectric project tulutiba ka atema tongtibtang alizüng ka tongtetba sayur.

Tunnel ana ya Larsen & Toubro (L&T Construction)-i yanglu aser iba ajanga tzünokdang takaraba nung yanglutsü atema lenmang sadema lapoktsütsü imlar.

Dibang Multipurpose Project Executive Director, Narendra Kumar-i, atakzüka aliba mapang tsüngda tunnel tem ya tembanga yangluba atema L&T Construction dang kanga pelaba lemsatep. Pai ashiba agi, tunnel ana ya yangluzükba ajanga iba project ya takaratiba nung tembanga yanglutsü asoshi teyari agütsütsü.

L&T nung Administrative Head & Industrial Relations (IR) Pradip Kumar Mahanti-i ashiba agi, tsüngsang mongpu

majungba aser longrenlongba nung mapa inyakba ajanga iba mapa inyakba mapang tetsükdaksü aika ajangshio.

Paisa, iba mapa takok ngua inyaksü atema NHPC Limited-i tongtibtang shilem agiba indang lemsatapa liasü.

Dibang Multipurpose Project ya yangluzüba sülen iba yagi Arunachal Pradesh nung power generation, tzümetzüng aziokba aser iba tesem terenlok nung teyari agütsütsü imlar.



NA SHINI MACHIR AMA BILEMER ASÜ? ANO BILEMDANGANG

Tenüing aika amshir

HIGH FRUCTOSE CORN SYRUP

AGAVE NECTAR

DEXTROSE

FRUCTOSE

SUCROSE

MALTOSE

CORN SYRUP

SUGAR

TENÜNGTEM JANGJAANG,
SHINI AMSHIBA AJEMANG

Package products malidang labels reprangang
#HarLabelKuchKehtahai

State Food Safety Authority,
Department of Health and Family Welfare, Govt. of Nagaland.

For any query mail us at: foodsafetynagalandhelpline@gmail.com

Putin-i Trump dang Iran rara mechi takoksa tulu ajurutsü ashi

Moscow, Rongchii/April 30 (Agencies): Russia Tir Vladimir Putin-i US Tir Donald Trump den telephone ajanga sensaksem dang United States aser Israel mitkari Iran anema asendenshir inyakra paidoktsü makokba takoksa tulu ajurutsü tekumdangtsü ashi, ta Kremlin ajanga ashi.

Kremlin ketdangsür Yuri Ushakov-i ashiba agi, Moscow sentong nung call ya asü, koba minute 90 dak tema temulung ajak sapoka jemb. Lenir ana ya Middle East, talisa Iran tensa aser Persian Gulf nung teblemtsü aliba nung rangloker jembia liasü, ta ashir.

Russia Tir-i Iran dak sendakba aser Persian Gulf tensa nung tali temulung agütsü, ta Ushakov-i ashi.

Tena jembidang Trump-i Iran den ceasefire atsülangtsü telemtetba agiba atema Putin-i pela agizük aser iba ya mapa shidak inyakba lir aser iba ya ajanga jembishinü akatsü mapang agütsü aser region tensa tajungba akumtsü ta ashi.

"Donald Trump-i Iran den ceasefire atsülangtsü

telemtetba agiba ya mapa shidak inyakba ama züngshir, kechiaser iba yagi jembishinü akatsü maongka agütsür aser tensa tajungba akumba nung yarir ta Vladimir Putin-i angateter," ta Ushakov-i ashi.

Ajisüaka mitkar inyakyim dangi meyipba ajanga Iran aser par kidanger atema kisüing masü saka international community atema timtem tulu alitsü ta pai tekumdangtsü ashi.

Middle East rara tangatetep kati arutsü asoshi akokba lenmang nung yariteptsü Russia temulungrtetba nung lir, aser Moscow-i animesor jembia, ta pai ashi.

Lenir ana ya Ukraine nung rara indanga jembia liasü, koba Russia-i 2022 küm par kidanger linük maker küm pongu buba nung lir.

"Trump-i asüingdangba ama Vladimir Putin-i line of contact nung tang tensa indang rasaa ashi, kong asen sepaitem tongtipang jenjang nung lir aser tsükchirtem nungdoke," ta Ushakov-i osangbener dang ashi.

(Maneni tapak 8 nung...)

TENÜNGSANG AGÜTSÜR



Merangkong senso Jamir Kidong telongjem Mendenti ajanga Sp. Benjongaküm Jamir, Wb. Meyidangit Jamir aser Wt. Moanaro na jabasoi NBSC ajanga agiba HSSLC 2026 tatidang nung top 9 (Science stream) Holy Cross Higher Secondary School Dimapur nungi takok tulu ngutetba asoshi pelar aser tetushi agütsür, Tsüngremi maneni tarutsü nubur teyimla asoshi nü taküm tali takokba aser temoatsü nung aniangma.

Sd/-
M. Jongponganger
(President)

Sd/-
Tiawapang
(General Secretary)



DIMAPUR MISSION HIGHER SECONDARY SCHOOL

Faith, Dedication & Sacrifice

Congratulations on your Achievement!

HSLC RESULT 2026 Students scoring 80% and above



HSLC RESULT 2026 DISTINCTION HOLDERS



HSSLC RESULT 2026 DISTINCTION HOLDERS



Zaragoza goalkeeper nem asaya 13 atema tenokdangba agütsü



Rongchii/April 30, 2026 (Agencies): Real Zaragoza goalkeeper Esteban Andrada nem Spanish Football Federation (RFEF)-i asaya 13 atema tenokdangba agütsüogo. Taoba hopta Huesca den asayaba mapang opposition asayar ka dak tsüngoktsüba atema pa nem iba tenokdangba agütsü.

La Liga 2 derby nung Zaragoza puri Huesca goal 1-0 agi makokba asaya nung Andrada nem yellow card ka agütsü aser minute 99buba nung

tanabuba yellow card agüja pa asaya nung tugudaktsü. Ajisüaka pa ground toktsür aotsü melena pai Huesca captain Jorge Pulido dak tejak nung tsüngoktsü aser iba sülen team ana tsüngda raratep tenzüka liasü.

Iba sülen goalkeeper ya sot aser State Security Forces temi anir dressing room-i ao.

Pulido laoba sülen team anaprongla nungi asayar aser staff tem raratep tenzüka liasü. Mapang tatsüka lir Andrada-i tatok meshiogo.

RFEF's Disciplinary Committee-i Bodhbarnü ken o asadanga sülen pa merenshitsu langa aliba nguteta asaya 12 atema tenokdangba agütsü aser iba den pa red card achiba atema asaya ka tenokdangba agütsüogo. Andrada ya Mexico club Monterrey nungi loan nung oa iba club nungi asayadar.

Mepetmesü adokba mapang Andrada dak tsüngoktsüba atema Huesca keeper Dani Jimenez nema asaya pezü atema tenokdangba agütsüogo.

Zaragoza nungi asayar Dani Tasende, shiba opponent ka dak metsüoktsüba atema VAR review sülen red card chia liasü, pa nema asaya ana atema tenokdangba agütsüogo.

Kasa mapang nung Deobarnü Rayo Vallecano aser Real Sociedad na goal 3-3 agütsür tembangba asaya nung referee indang ashishiba atema Vallecano nungi asayar, Isi Palazon nema asaya tenet atema tenokdangba agütsüogo.

Pa ya melenatoker liasü saka asaya atemtsü lia bench nungi ashishiba atema red card agüja liasü.

Rayo puri idaktsüba goal ka video review sülen magi kümdaktsü aser iba melena Sociedad nem penalty ka agütsüba asoshi pai ashishia liasü.

Thomas Cup: India team Chinese Taipei den quarter asayatsü

Rongchii/April 30, 2026 (Agencies): BWF Thomas Cup Finals nung India tebur team quarterfinal nung Chinese Taipei den asayatsü ataogo. Quarterfinal atema draw ya Brehostibarnü Horsens nung süa liasü.

2022 küm iba asayamung koker aliba team ya Group A nung tanabuba jenjang nung tembang. Mezüngbuba asaya ana nung Canada aser Australia na 4-1 aser 5-0 agi akokba sülen parnok quarter-final atema qualify süatoker liasü. Ajisüaka Bodhbarnü group nung asaya tatembangbuba nung parnoki China team 3-2 agi makok.

Kasa mapang nung Chinese Taipei team kanga meranga asayar quarter-finals atema qualify süatogo.

Defending champions China team shirnok Group A nung asaya ka nunga danga tamakok mongui lir parnok Malaysia den asayatsü.

Group B nung temaba jenjang nung tembangba Japan team France den asayatsü, shirnoki iba asayamung 14 koker aliba Indonesia team ajateta liasü. Group C nung tanabuba jenjang nung tembangba Denmark team Thailand den asayatsü.

Indonesia sülenbo China-i

iba asayamung ya timbaben (11) koka lir. China team yagi 2004 nungi 2012 tashi nung iba asayamung ponguben atonga akok, saka 2014 küm semifinal nung Japan-i tsükdaktsü, shirnoki New Delhi nung Malaysia koka iba asayamung mezüngbuba koka liasü.

Iba sülen Denmark-i 2016 küm iba asayamung koka Asia nung maliba linüktem rongnungi Thomas Cup akokba mezüngbuba linük aküm. Kunshan nung final nung parnoki Indonesia koka liasü. 2018 küm maneni China-i Bangkok nung final nung Japan 3-1 agi akok.

2020 küm asayamung ya Covid-19 wara poktetba ajanga 2021 küm October ita asaya. Final nung Indonesia-i China 3-0 agi koka liasü.

Maneni 2022 küm Bangkok nung India-i otsü tasen ka yanglua iba asayamung mezüngbuba akok. Parnoki final nung Indonesia 3-0 agi akok. Iba sülen China-i maneni Chengdu nung Indonesia 3-1 agi koka liasü.

BWF Thomas & Uber Cup 2026 Knockouts Draw
China vs Malaysia
Thailand vs Denmark
France vs Japan
India vs Chinese Taipei.

INDIA OSANG :

Tapak 3 nungi...

Karnataka nung Chief Minister...

Home Minister G. Parameshwara-i, Kharge ya Chief Minister asütsü temsüa lir ta jembiba dak sendakba nung tasüngdangba ka langzüdang Kharge-i, osangbenertem mesüra lenir kar taginübaji ibaji asütsüa akok, ajisüaka iba telemtebaji Sonia Gandhi-i agütsü, ta ashi.

Osangbenertem den jembidang Kharge-i, "Tangbo iba tasüngdangbaji madoker, kechiyong Chief Minister lir. Sonia Gandhi aser Rahul Gandhi onoki telemtetba kar

agütsü asü nunga iba atemaji mapang agütsü," ta metetdaktsü. Bodhbarnü Parameshwara-i, lenir tain aser aika ajangshia aliba lenir Kharge Chief Minister shim nungbo party-i pelaa agizüktsü, ta metetdakja liasü.

Yaküm November 20 nü Karnataka nung Congress sorkar kümsük tesadang (küm 2 ser tesadang) abensaba mapang nungi Chief Minister melentsü atema jembir.

Congress sorkar akümba mapang nung Siddaramaiah aser Shivakumar na melentepa

chief minister inyaktsü bangjema lir, ta shia Shivakumar pusemertemi pa nem Chief Minister menden agütsütsüla, ta akhanger.

JD(S) lenir aser Union Minister H.D. Kumaraswamy-i, Congress MLA 40-i taruba ita Delhi-i aotsü atema tickets mekazükogo, ta jembiba dak sendakba nung tasüngdangba ka langzüdang Congress National Tir Kharge-i, "Ni ibaji memetet, anungji pa dang iba osangji tejangja asüngdangang," ta ashi.

BENDANGLI OSANG :

Tapak 7 nungi...

Putin-i Trump dang Iran rara...

"Vladimir Putin aser Donald Trump nati (Volodymyr) Zelensky-i aniba Kyiv yimli indang yimya kasa asadangtetba lemsatet, shiba Europeans teyari nung talangba raratsü tasa bushir."

Lenir anaprongi Ukraine lenirtem indang angatetba mesüktepa lemsatet aser European teyari nung talangba raratsü meranger ta aitsü.

Putin den jembiba sülen Moscow-i tsükchitep anena atatsü mulunga alia ma Trump-i ashi.

Russia tangatetba

melenshiba ajanga tezüngzüktep ka yanglutsü akok amai pai ashi.

Putin-i tensa tajungba kumdaaktsütsü atema mulunga aliba sayuogo aser Russia leniri ceasefire ka alitsü indang süok, koba mapang talangka melie sangdongtsü akok, ta Trump-i ashi. Taoba mapanga Putin-i tezüngzüktep ka alitsü mulunga liasü, saka tetsükdaktsü kar ajanga terenlok benjadaktsü, ta pai ashi.

"Ni tanü Vladimir Putin den jembir... Ni Ukraine indang jembir, aser ni Iran indanga tera

jembir, Ni onük balala indang kar jembir, timba Ukraine indang, aser küna sensaksem junga liogo. Aser yakta tangatetep kati arutsü ama ni bilemer. Pai-a tangatetep ka aginer ama ni bilemer, aser aji tajung," ta Trump-i ashi.

Maneni tsükchitep liaka Putin-i May 9 nü Victory Day amungdang ken asoshi ceasefire ka sangdongtsü renema lir ama sayuogo, koba Soviet Union-i World War II mapang Nazi Germany madak takok anguba benjong ka lir.

Riyan Parag dang pa indang match fee 25% senchi achi



Rongchii/April 30, 2026 (Agencies): Rajasthan Royals aser Punjab Kings na asayaba mapang IPL Code of Conduct nung aibelenba atema Rajasthan Royals captain Riyan Parag dang pa indang match fee shilem 25 senchi achiba den demerit point ka agütsütsü ta shia lir.

Video temai adokba sülen iba tatalokba ya jangja aküm. Iba sülen on-field umpires Tanmay Srivastava aser Nitin Menon nati ken o metetdaktsü.

IPL media advisory-isa, IPL tenüng memenukdaktsütsü atema aibelenba team, ketdangsurtem aser asayartem anema jenjang tesashi agütsü asoshi BCCI-i lenmangtem bushidar, ta ashi.

Parga inyakyim ya social media nung aikati aitsüogo, kechiyong e-cigarettes ya India nung meyaglutsü aser mayoktsü atema 2019 küm ozüng ka yanglua agizükba sülen tenokdangba agütsür lir.

BILEMDANGANG

"Süitemer mesasatsü atema tang takok tashi inyakang."